



# Herremättli-Clique

Sujet 2006

Pimp mai Fasnacht.....

oder

Mechtsch au e neye Waage?

Bisch heggschtens knapp iiber zwanzig,  
gaischtig no zwääg und kai bitzeli ranzig.  
Gaffsch reegelmääsig Emtywyy,  
bisch also doo und voll derbyy.  
Ebbe-n-au kai alti Schääse.  
Denn muesch jetz gar nimm wyterlääse,  
das wäär bigott verlooreni Zyt,  
gib dä Zeedel wyter an dini Noochberslyt.

Bisch hingeege in de „beschte“ Joor,  
hesch ebbe scho d'Tendänz zue Runzle?  
Kunnt dir dä Waage spanisch voor?  
Dytsch und dytlig, bisch e-n- alti Gumsle,  
e Gruffdi, oder halt e-n-alte Sagg,  
und gheersch nit zue däm junge Pagg?  
Denn sottsich jetz e weeneli Zyt spendiere  
und di in's Thema „Pimpe“ loo yfiehre!

S'goot drumm, ass me ebbis duet uffmotze,  
zer beschte Sändezyt in dr Glotze.  
Bivoor di muesch gottloos schiniere,  
loss dir das alles doo äggschblyziere.

S'Grundprinzip isch aigentlig rächt simpel.  
S'fangt aa mit irgend-e-me liederlige Grimpel,  
do druss wird, innert weenige Dääg,  
ebbis ganz anders, scheen und zwääg.

S'ka-n-e alti Bänne syy,  
duuregroschtet und verbyy.  
S'macht nyt, wenn's iiberall duet lottere,  
nur dr Motoor sott mindeschtens no stottere.  
Hauptsach, är duet grad no faare,  
dä altersschwachi, luusig Kaare.

Jetzt mäldsch di aa bim Emtywyy  
und wenn de Gligg hesch bisch derbyy.

S'wird gschruubt und usenander gnoo,  
kuum ebbis wird no zämme gloo.  
Denn git's neye Perlmuet-Lagg  
und Chrom git's grad im Multipagg.  
E glänzige Kiehlergrill mit neyem Embleem,  
s'Änteriöör wird rosa und greem.  
D'Blastiggsitz wärde mit Plysch iiberzooge.  
Glaubsch es nit? Das isch nit glooge!  
Es isch aifach alles meega krass!  
Au d'Muusigagalag mit Bum-Bum-Bass.  
Zem Yystyyge git's jetz Fliigeldiire,  
wo uffgeen vo hinde unde noo oobe fiire.

Zem Schluss wird au dr Motoor nit verschoont,  
was me gseet, das wird verchromt.  
S'wird Laischtig gsuecht und au gfunde,  
mit vyyl Draimomänt im Käller unde,  
fir hirnloosi, megaschnälli Runde.

Wenn du di Waage denn wiider kasch haa,  
isch nit me soo wie friener draa.  
Är stoht deert uff braite Schlappe  
und dii koschtet dä Spass nit ai Rappe!

Au Erte-ell, Sattains und Brosiibe,  
sinn nit hinter em Oofe bliibe.  
So äänlig macht me's jetz au no  
mit Weeloo, ganze Loschyys samt Klo.

Dr näggschti Hit wird dängg denn syy,  
„Pimp mai Waif“ ..... Bisch derbyy?  
Zerscht wird si yyglegt in Eeselsmilchbääder,

fir sammetiggs und straffers Lääder.  
Dernoo git's zwai neyi, satti Brischt,  
au d'Grampfooder wärde uusegfischt.  
S'git langi Wimpere und uffgschpritzti Lippe.  
Stell dir voor, in Zuekunft will si jeede-n-Oobe strippe,  
uff em Stuubedisch oder voor dr Glotze,  
wenn de si eso duesch uff lo motze!

Kurz gsait, s'wird fascht wie im Baredyys,  
numme dir goht's nääbedraa kaibe myys,  
denn dr Hoogge an däm ganze,  
du hesch immer no e digge Ranze.....

*D'Waage- und Requisite-Uusstellig  
isch wie immer bi dr Kasäärne  
und d'Laddärne-Uusstellig  
isch allewyyl no uff em Minschterplatz,  
vom Määntig znacht, em 6. Meerze,  
bis am Mittwoch demorge, em 8. Meerze.  
D Wäägeler fraie sich uff iire Bsuech.*